

- 1^r Wer yetz kan strichen wol den hengst
- 2^r Vnd ist zů allem bschisß der gengst
- 3^r Der meynt zů hoff syn aller lengst

Kap. 100



von falben hengst strichen

- 1 Mir kem eyn verdeckt schiff yetz recht
- 2 Dar jnn ich setzt der herren knecht
- 3 Vnd ander die zů hoff gont schlecken
- 4 Vnd heymlich by den herren stecken

5 Do mit sie sassen gar alleyn
 6 Vnd vngetrengt von der gemeyn
 7 Dann sie sich nit wol mögen lyden
 8 Der eyn klubt fädern / der stricht kryden
 9 Der liebkosßt / der runt jnn die oren
 10 Das er vff kum jn kurtzen joren
 11 Vnd sich mit daller schlecken ner /
 12 Mancher durch lyegen würt eyn herr
 13 Dann er den kutzen strichen kan
 14 Vnd mit dem falben hengst vmb gan
 15 Zü blosen mål ist er geschwynd
 16 Den mantel hencken gen dem wynd
 17 Züdütlen hilfft yetz manchem für
 18 Der sunst langzyt blib vor der thür
 19 Wer schlagen kan / hor vnder woll
 20 Der selb zü hoff gern bliben soll
 21 Do ist er worlich lieb / vnd werd
 22 Der erberkeyt man do nit bgert
 23 Mit torheydt dünt sie all vmb gon
 24 Went mir die narrenkapp nit lon
 25 Doch strigelt mancher offft so ruch
 26 Das jnn der hengst schmytzt jn den buch
 27 Oder gyt jm eyn dryt jnn die ryppen
 28 Das jm das daller felt jn die kryppen
 29 Der selben wer gütt müssig gon
 30 Wann man sunst wißheydt wolt verston /
 31 Wann yeder wer / als er sich stelt
 32 Den man für frumm / vnd redlich helt
 33 Oder stelt sich als er dann wer
 34 Vil narren kappen stünden lår

30 sunst *GW5046 GW5047*] fust *GW5041*